

Արսեն Է. Հարությունյան

ars.vimagraget@gmail.com

orcid: 0000-0002-4890-5584

**ՏԱԹԵՎԻ ՎԱՆՔԸ՝
ՍԲ ԵՎՍՏԱԹԵՈՍ ԱՌԱՔՅԱԼԻ ՈՒՒՏ***

Ամփոփում

Սյունյաց հոգևոր-մշակութային կենտրոն Տաթևի վանքի պատմության ուսումնասիրման համար առաջնային սկզբնաղբյուր է պատմագիր Ստեփանոս Օրբելյանի պատմագիրքը (գրված՝ Նորավանքում, 1297 թ.): Պատմագիրը մանրամասն նկարագրում է Տաթևի վանքի Կաթողիկե եկեղեցու կառուցումն ու Սբ Պողոս-Պետրոս առաքյալների նշխարների ամփոփումը տաճարի գույգ մույթերի հիմքերում՝ չհիշատակելով Քրիստոսի կամ Սբ Թադեոս առաքյալի ենթադրյալ աշակերտ Սբ Եվստաթեոս-Եվստաթե-Ստաթեին: Վերջինիս անունը վկայված չէ նաև վաղ շրջանի մատենագրական և վարքագրական աղբյուրներում, այլ միայն 15-րդ դարից ի վեր:

Տաթևում Սբ Պողոս-Պետրոս առաքյալների անունների քողարկման և վանքը ենթադրյալ Սբ Եվստաթեոս առաքյալի անվան հետ զուգակցման բուն պատճառը կարելի է պայմանավորել ժամանակի եկեղեցաքաղաքական պայմանների թելադրանքով, երբ Կիլիկիայում գտնվող կաթողիկոսական աթոռի որդեգրած լատինամետ դիրքորոշման հետևանքով Սյունիքում ընդլայնվել էր ունիթորական շարժումը՝ Նախիջևանի Քոնս կենտրոնով: Այս տեսանկյունից, թերևս, սխալված չենք լինի, եթե ասենք, որ այդ էր Սյունյաց հոգևոր և եպիսկոպոսանիստ կենտրոնն առաքելադիր հռչակելու հիմնական պատճառը:

* Հոդվածն ընդունվել է տպագրության 15.03.2025:

Ինչ վերաբերում է Տաթև տեղանվանը, ապա այն քանիցս հիշվում է մատենագրական և վիմագրական աղբյուրներում, որոնցից վաղագույնը, թերևս, «Ներսեսյան» գահնամակում պահպանված տոհմանունն է՝ «Տաթևյանը», ապա նաև Օրբելյանի վկայությունները, 13-14-րդ դդ. ձեռագրերի հիշատակարաններն ու վանքի ժամանակամերձ վիմագրերը, այսինքն՝ Տաթև տեղանունը վավերացվում է դեռևս վաղ միջնադարում և հետագա դարերում: Սբ Եվստաթեսի անվան շուրջ հյուսված ավանդության ու դրա կրոնական-քաղաքական դրդապատճառներից զատ, վանքի Կաթողիկեն այսօր նորից իր սուրբ առաքյալների՝ Պողոսի և Պետրոսի անունն է կրում, իսկ Սբ Եվստաթեսի անվան հետ են կապում միայն վանքի պարսպից դուրս՝ հյուսիսարևելյան կողմում գտնվող կիսավեր հուշակառույցը:

Բանալի բառեր – Սյունիք, Տաթևի վանք, Սբ Եվստաթես առաքյալ, Սբ Պողոս-Պետրոս եկեղեցի, Ստեփանոս Օրբելյան, ունիթորական շարժում, Կիլիկիա, ձեռագիր, հիշատակարան, վիմագիր:

Arsen E. Harutyunyan

TATEV MONASTERY AS A PLACE OF PILGRIMAGE OF ST. EUSTATHIUS THE APOSTLE

Abstract

For studying the history of Tatev Monastery - the spiritual and cultural center of Syunik, the primary source is the historical book by chronicler Stepanos Orbelyan (written in Noravank in 1297). The historian describes in detail the construction of the cathedral of Tatev Monastery and the placement of the relics of Saints Paul and Peter in the foundations of the twin columns of the temple, without mentioning the supposed disciple of Christ or Saint Thaddeus - Saint Eustathius (Eustace-State). The latter's name is not attested in early literary and hagiographic sources either, but appears only from the 15th century onwards.

The main reason for concealing the names of Apostles Paul and Peter in Tatev and associating the monastery with the supposed Apostle Eustathius can be attributed to the church-political conditions of the time, when as a result of the pro-Latin position adopted by the Catholicosate throne in Cilicia, the Unitor movement expanded in Syunik with its center in Krna in Nakhichevan. From this perspective, it can be argued

that this was the primary rationale for designating the spiritual and episcopal centre of Syunik as apostolic.

As for the toponym *Tatev*, it is mentioned multiple times in literary and epigraphic sources, the earliest of which is probably the family name *Tatevians* preserved in the “Nersesian” throne list, as well as Orbelian’s testimonies, manuscripts from the 13th-14th centuries, and contemporary monastery inscriptions, meaning the toponym *Tatev* is documented as the early medieval period and in subsequent centuries. Apart from the legend woven around the name of Saint Eustathius and its religious-political motives, the monastery’s main church today again bears the name of its holy apostles - Paul and Peter, while only the semi-ruined memorial pillar located outside the monastery wall on the northeastern side is associated with the name of St. Eustathius.

Key words – Syunik, Tatev Monastery, St. Eustathius the Apostle, St. Paul and Peter Church, Stepanos Orbelyan, Unitor movement, Cilicia, manuscript, colophon, epigraph.

Арсен Э. Арутюнян

ТАТЕВСКИЙ МОНАСТЫРЬ КАК МЕСТО ПАЛОМНИЧЕСТВА СВЯТОГО АПОСТОЛА ЕВСТАФИЯ

Резюме

Для изучения истории Татевского монастыря – духовно-культурного центра Сюника, первоисточником является историческая книга летописца Степаноса Орбеляна (написанная в Нораванке в 1297 г.). Историк подробно описывает строительство Кафедрального собора Татевского монастыря и помещение мощей святых апостолов Павла и Петра в основания парных колонн храма, не упоминая при этом предполагаемого ученика Христа или Святого Фаддея – Святого Евстафия (Евстафе-Статея). Имя последнего не засвидетельствовано также в ранних литературных и агиографических источниках, а появляется только начиная с 15-го века.

Главная причина сокрытия имен апостолов Павла и Петра в Татеве и привязки монастыря к предполагаемому апостолу Евстафию может быть обусловлена церковно-политическими условиями того времени, когда в результате пролатинской позиции, принятой католикосским престолом в Киликии, в Сюнике расширилось унитарское движение с центром в Крна в Нахичеване. С этой точки зрения, возможно, мы не ошибёмся, если скажем, что это была

основная причина провозглашения духовного и епископского центра Сюника апостольским.

Что касается топонима *Tatev*, то он неоднократно упоминается в литературных и эпиграфических источниках, древнейшим из которых, вероятно, является родовое имя *Tatevany*, сохранившееся в “Нерсесском” престольном списке, а также свидетельства Орбеляна, рукописи 13-14 веков и современные им надписи монастыря, то есть топоним *Tatev* документально подтверждается еще в раннем средневековье и в последующие века. Помимо легенды, сплетенной вокруг имени Святого Евстафия, и её религиозно-политических мотивов, Кафедральный собор монастыря сегодня снова носит имя своих святых апостолов – Павла и Петра, а с именем Св. Евстафия связывают только полуразрушенный памятный столб, находящийся за пределами монастырской стены с северо-восточной стороны.

Ключевые слова – Сюник, Татевский монастырь, Св. Евстафия, церковь апостолов Павла и Петра, Степанос Орбелян, унитарское движение, Киликия, рукопись, памятный запис, надпись.

Մուտք

Տաթևի վանքը, հայտնի նաև՝ Սբ Եվստաթեոս (Եվստաթե, Ստաթե) առաքյալի ուխտ, Եվստաթեի վանք և այլ անվանաձևերով, միջնադարյան Հայաստանի առավել նշանավոր հոգևոր-մշակութային կենտրոններից է: Վանքն իր հարուստ պատմամշակութային ժառանգության շնորհիվ մշտապես եղել է ուսումնասիրողների ուշադրության կենտրոնում՝ լինելով ինչպես պատմագիտական, այնպես էլ արվեստի պատմության տարբեր բնագավառներին առնչվող ուսումնասիրությունների առանցքում:

Վերջին տարիներին այդ շարքը փորձում ենք լրացնել նաև վիմագրագիտական և ձեռագրագիտական հետազոտություններով, որոնք երբեմն առիթ են դառնում նաև վանքի պատմության տարաբնույթ հարցերին նորովի անդրադառնալու համար: Այդօրինակ խնդիրներից է վանքի անվան հետ զուգակցվող Սբ Եվստաթեոս առաքյալի շուրջ ձևավորված ավանդությունը, որն ինչ-որ տեղ հակադրվում է վանքում Սբ Պողոս—Պետրոս առաքյալների մասունքների՝ Կաթողիկե եկեղեցու հիմքերում ամփոփված լինելու իրողության հետ, ինչով պայմանավորված՝ գրականության մեջ նմանօրինակ դրվագները հիմնականում շրջանցվել կամ խիստ հպանցիկ են ներկայացվել: Բավական է ասել, որ 13-րդ դարի պատմագիր, Սյունյաց մետրոպոլիտ Ստեփանոս Օրբելյանի երկում

(գրված Նորավանքում՝ 1297 թ.), որն իրավամբ համարվում է Տաթևի վանքի պատմության առաջնային սկզբնաղբյուրներից մեկը, վանքի անվան ծագման առնչությամբ որևէ հստակ տեղեկություն չի հաղորդվում, փոխարենը պատմագիրը մանրամասն նկարագրում է վաղմիջնադարյան եկեղեցու տեղում գլխավոր տաճարի կառուցումը 895-906 թթ.² նվիրված Սբ Պողոս-Պետրոս առաքյալներին, որոնց նշխարներն ամփոփվել են նորահիմն տաճարի զույգ մույթերի հիմքերում:

Խնդրի ուսումնասիրությունն առաջին հայացքից հուշում է վաղքրիստոնեական սրբավայրերի համար ավանդական դարձած մի երևույթի մասին, երբ առաքյալների և նրանց ենթադրյալ աշակերտների քարոզչության, ապա՝ նահատակման վայրերում կանգնեցվում էին նոր կրոնի առաջին վկայարանները, որոնց տեղում հետագայում հիմնվեցին վանական խոշոր համալիրներ, ինչպես Արտազի Սբ Թադեի վանքը՝ Թադեոս առաքյալի, Աղբակի Սբ Բարդուղիմեոսի վանքը՝ Բարդուղիմեոսի, կամ Դադիվանքը՝ Թադեոսի աշակերտներից Դադի, Դադու կամ Դադոյի, Խադավանքը՝ Խադ եպիսկոպոսի, Սբ Եղիշա առաքյալի վանքը՝ Եղիշայի և այլն: Այս նույն տրամաբանությամբ էլ, փաստորեն, Տաթևի վանքն է ավանդաբար կառուցվել Քրիստոսի յոթանասուներկու կամ Թադեոս առաքյալի ենթադրյալ աշակերտներից Եվստաթեոսի (Եվստաթե-Ստաթեի) նահատակման և նշխարների ամփոփման վայրում, որի վկայությամբ տեղեկությունները մատենագրության մեջ ավանդված են առավելապես ուշմիջնադարյան աղբյուրներում, ինչն էլ դարձել է մեր սույն ուսումնասիրության խնդրո առարկան:

1. Սբ Եվստաթեոս առաքյալը հայ մատենագրության մեջ

Հայ գրավոր ժառանգության և բանավոր ավանդության մեջ շրջանառվում է Տաթևի վանքի անվան ստուգաբանման մի քանի տարբերակ, որոնցից առավել հայտնին Քրիստոսի յոթանասուներկու կամ Թադեոս առաքյալի աշակերտներից Եվստաթեոսի անվան հետ զուգակցման վարկածն է: Ըստ ավանդության՝ Եվստաթեոսը, հայտնի նաև՝ Եվստաթե, Ստաթեոս, Ստաթե, Ըստաթե, Դաթե² անվանաձևերով, Քրիստոսի յոթանասուներկու աշակերտներից էր, երբեմն էլ հիշվում է իբրև Թադեոսի աշակերտներից մեկը, որը, վերջինիս կողմից ձեռնադրվելով Սյունյաց ա-

² Անունը հունարենից (Εὐστάθιος) նշանակում է «հաստատուն, կայուն, մտքով ու գործով հավասարակշիռ» (Աճառյան, 1944, 151):

ռաջին եպիսկոպոս, մոտ 60–80 թթ. Սյունիքում քրիստոնեություն է քարոզել, նահատակվել անհավատների ձեռքով, իսկ նշխարների վրա հետագայում վանք է հիմնվել (Սալլանթեանց, 1831, 96; Շահխաթունեանց, 2014, 110; Օրմանեան, 2001, սին 25)³։ Չնայած հիշյալ ավանդությանը՝ Սբ Գրքում Քրիստոսի յոթանասուներկու աշակերտների առաքելությանը վերաբերող հատվածում նրանցից որևէ մեկի անունն ուղղակիորեն վկայված չէ. «Յեր այսորիկ երեւեցոյց Տէր եւ այլ եւս եւթանասուն եւ երկուս եւ առաքեաց զնոսա երկուս երկուս առաջի իւր յամենայն քաղաքս եւ ի տեղիս, ուր ինքն երթալոց էր» (Գուկ. Ժ. 1), թեև սա չի խանգարում, որ մատենագրության մեջ երբեմն հանդիպենք յոթանասուներկու աշակերտների հետ առնչվող անուններ, այդ թվում նաև՝ ոմն Ստաքոս (Միխայել Ասորի, 1871, 104)։



**Նկ. 1 Տաթևի վանական համալիրը հարավ-արևմուտքից
(լսնկ.՝ Ա. Հարությունյանի, 2015)**

³ Կան նաև անվան ստուգաբանման այլ տարբերակներ ևս. դրանցից մեկն ավանդական հիմք ունի, ըստ որի. «Ճարտարապետը, ավարտելով Տաթևի շինությունը՝ բարձրացել է գմբեթի վրա, դրել է խաչը և հետո խնդրելով ներքևում եղող բանվորներից երկու տախտակ՝ բռնել է ձեռներում, համբուրել և ասել. «Հոգին սուրբ տա թև»։ Անմիջապես տախտակները թևերի են փոխարկվել, և նա թռել, աներևութացել է։ Այս պատճառով էլ վանքի անունը մնացել է Տա թև՝ Տաթև» (Լալալյան, 2021, 22; Դանալանյան, 1969, 230)։ Տաթև անունը կապում են նաև խեթալուվիական երկնքի և ամպրոպի աստվածության Դաթա կամ Տատա անվան հետ (Ումառյան, 1981, 30)։

Սբ Եվստաթեոսի անվան շուրջ ձևավորված հիշատակումներն ավանդադրույցներում, ինչպես նաև պատմական, աստվածաբանական, առավել ևս՝ վարքագրական աղբյուրներում խիստ կցկտուր են⁴։ Կարելի է ասել, որ մինչև 15-րդ դարն ընդգրկող գրավոր աղբյուրներում Սբ Եվստաթեոսն առհասարակ չի հիշատակվում, ինչն էլ առիթ է դարձել հետագա ուսումնասիրողներից ոմանց թերահավատորեն մոտենալու կամ ուղղակիորեն ժխտելու Տաթևի վանքի և առաքյալի անվան միջև առկա հնարավոր աղերսը։ Առաջին հայացքից ուշագրավ է թվում 13-րդ դարի մատենագիր **Վարդան Արևելցուն** վերագրվող «Աշխարհացոյց»-ում վկայված հիշատակությունը՝ Սյունիքում Սբ Եվստաթեոս առաքյալի աթոռի գոյության և այն Տաթևի վանքի հետ նույնացնելու առիթով. «*Մեծ Սինիս եւ Փոքր Սինիս, ուր կայ աթոռն Եւստաթէի առաքելոյն, որ կոչի Տաթև*» (Վարդան վարդապետ, 1960, 12)։ Սակայն, երբ նկատի ենք առնում այն, որ «Աշխարհացոյց»-ը մեզ է հասել միայն ուշ շրջանի ընդօրինակություններով, որոնցից վաղագույնը 1565 թվակիր «Ոսկեփորիկ» ձեռագրում տեղ գտած միավորն է (Վստկ 947/243) (ՄՅՀԶ ի Վենետիկ, 1924, սին 633), ինքնին հասկանալի է դառնում, որ բնագիրը հետագայում կարող էր խմբագրվել և լրացվել (Անթապյան, 1987, 90), առավել ևս, որ ֆրանսահայ հայագետ Հայկ Պերպերյանը փաստում է բնագրի՝ 24 ձեռագրերի և տպագիր երեք հրատարակությունների (Կ. Պոլիս, 1728 թ., Փարիզ, 1819 թ., Վենետիկ, 1887 թ.) համեմատական քննության արդյունքում պարզված տարբերություններն ու միջամտությունները (Վարդան վարդապետ, 1960, 12)։ Անկախ մեզ հետաքրքրող հատվածի՝ ուշ շրջանի հավելագրություն լինելու հավանականությունից, վկայված տեղեկությունը պարզում է, որ Մեծ ու Փոքր Սյունյաց աշխարհի աթոռանիստ կենտրոնում է գտնվել Սբ Եվստաթեոս առաքյալի աթոռը, այն է՝ եպիսկոպոսանիստը, որ նույն Տաթևն է։ Ինչպես ստորև կտեսնենք, Տաթևում գտնվող Սյունյաց աթոռանիստը հաճախ Սբ Եվստաթեի անվան հետ է զուգակցվել նաև Տաթևի վանքից հայտնի 15-րդ և հետագա դարերի ձեռագրերի հիշատակարաններում, բայց ոչ երբեք Ստեփանոս Օրբելյանի երկում, վարքագրություններում կամ վաղ շրջանի մատենագրության մեջ։ Ուստի նախ պարզենք

⁴ Այդ անունով մատենագրությունից հայտնի են Եվստաթեոս Թեսաղոնիկեցին, որ մեկնել է Հոմերոսը, Եվստաթեոս եպս. Սեբաստացին, որը միայնակեցության նախահայրերից է, Եվստաթիոս եպս. Հայոց, որն ընդունեց Քաղկեդոնի դավանանքը և այլն (Աճառյան, 1944, 151-152)։

գրավոր աղբյուրներում Սբ Եվստաթես առաքյալին առնչվող վկայությունների ժամանակագրությունը:

Սրբոց վարք-վկայաբանություններն ամփոփող «Հայսմավուրք» ժողովածուներում Սբ Եվստաթես առաքյալի վարքն առանձին վկայված չէ: Նրա անունը տարբեր առիթներով հիշատակվում է միայն կողմնակի կերպով, այն էլ՝ ուշ շրջանի խմբագրություններում. օրինակ՝ Սբ Պորփյուրոս եպիսկոպոսի վարքում. «Մեհեկի ԻԸ. (28) և Մարտի Զ. (6). Վարք և յիշատակ Սրբոյն Պորփիրոսի», որտեղ Սբ Գրիգոր Լուսավորչի թոռան՝ Աղվանից կաթողիկոս Սբ Գրիգորիսի նահատակությունից հետո նկարագրվում է նշխարների ամփոփման տեսարանը, որը տեղի ունեցավ. «...ի գիւղաքաղաքն Ամարաս՝ յեկեղեցին, զոր հիմնարկեալ էր Սուրբն Գրիգոր Լուսաւորիչն և մանուկն Գրիգորիս կարարել էր զայն շինութեամբ և օրհնեալ: Եւ եղին անդ ընդ սուրբ մարմնոյն (Գրիգորիսի – Ա. Հ.) և շիշ մի լի արեամբ յարենէ սրբոյն Զաքարիայ՝ հօրն Յովհաննու Կարապետին, զոր բերեալ էր Եւստաթէոս առաքեալն, որ էր յաշակերտաց սրբոյն Թադէոսի առաքելոյն, այլ և ի նշխարաց սրբոյն Պանդալիոնի բժշկին, զոր բերեալ էր Սուրբն Գրիգոր Լուսաւորիչն մեր և յուրեալ իւրոյ թոռինն Գրիգորիսի» (Յայսմավուրք, 1730, 415): Սրա հետ մեկտեղ, Աղվանից աշխարհի պատմությունն ավանդած Մովսէս Կաղանկատվացի Ամարասում ամփոփված սրբոց նշխարների առիթով Սբ Եվստաթեսին չի հիշատակում, փոխարենը մատնեքների տեղափոխումը վերագրում է Սբ Գրիգորիսին, որոնց մի մասը նա ավելի վաղ ամփոփում է. «ի մեծ քաղաքն Յրի (Յոր – Ա. Հ.)»՝ իր իսկ կառուցած եկեղեցում և. «...դնէր անդ մեծ զգուշութեամբ մասն ինչ յարենէն Զաքարիայ և ի նշխարաց սրբոյն Պանդալիոնի» (Մովսէս Կաղանկատուացի, 1983, 37): Նույն պատմագրի հաղորդմամբ՝ որոշ նշխարներ դեռ Սբ Գրիգորիսի մոտ էին, երբ նա նահատակվեց մազքութների թագավոր Սանեսանի հրոսակների ձեռքով՝ Վատնյան դաշտում: Այնուհետ նկարագրությունը կարծես կրկնվում է. Սբ Գրիգորիսի նշխարներն աշակերտներն ամփոփում են Ամարասի եկեղեցում՝ մեկտեղ դնելով Զաքարիայի սուրբ արյան սրվակն ու բժիշկ Պանդալիոնի նշխարը. «Եւ այսպէս պսակէր սուրբն, զոր բարձեալ աշակերտացն՝ բերէին յԱմարաս գիւղաքաղաքն, որ էր ի գաւառին Հաբանդայ: Անդ եղեալ առ եկեղեցոյն՝ հուպ ի բեմն ի հիւսիսոյ կողմանէ. և զսուրբ արիւնն Զաքարիայ ի միում ապակեղէն շի եղեալ և ի միւսում շի զերանելոյն Պանդալիոնի զնշխարիս. և եղեալ զերկոսեան շիշն ընդ ամենասուրբ նշխարան մանկանն Գրիգորիսի և ինքեանք փախստեայ ի Հայս անկանէին» (Մովսէս Կաղանկատուացի, 1983, 39):

«Հայսմավուրք» ժողովածուների մյուս հիշատակումներն ուղղակիորեն կապված են Տաթևի վանքի հետ՝ վկայված Սբ Գրիգոր Տաթևացու վարքում. «*Ահեկի Ի. (20) և Ապրիլի ԻԷ. (27). Վարք և յիշատակ երանելոյն Եռամեծի Սրբոյն Գրիգորի Տաթևացոյն...*» խորագրի ներքո ներկայացվում են Սբ Գրիգոր Տաթևացու ուսումնառության, ուսուցչության, քարոզչության ու վախճանի մանրամասները, այդ թվում՝ աշակերտների հետ հաստատվելը. «*ի սուրբ ուխտն և շնորհալից գերահռչակ Աթոռն Հայրաթէի առաքելոյն*» (Յայսմավուրք, 1730, 532): Այստեղ էլ նրա գլխավորությամբ հիմնվում ու ծաղկում է Տաթևի համալսարանը, զարգանում գրչության արվեստն ու մանրանկարչությունը, թարգմանվում, ընդօրինակվում են բազմաթիվ ձեռագրեր: Այստեղից քարոզչության գնալով Մեծոփավանք, ապա՝ Արարատյան երկիր, ուր լինում է նաև Երևանի Սբ Անանիա առաքյալի անապատում (ներկայիս Զորավոր Սբ Աստվածածին եկեղեցու տեղում), Տաթևացին իր աշակերտների հետ վերադառնում է. «*...ի շնորհալից աթոռն իւր, ի Սուրբ առաքելոյն Սյրաթէի*» (Յայսմավուրք, 1730, 535), որտեղ էլ 1409 թ. վախճանվում ու թաղվում է. «*...ի շիրմի ի շնորհագարդ և յամենագով Աթոռն Սբ Սյրաթէի առաքելոյն*» (Յայսմավուրք, 1730, 535): Վերջին հիշատակությունը որոշակիորեն ընդգծում է առաքյալի նշխարների՝ Տաթևում ամփոփված լինելը:

Եկեղեցական մատենագրության ու պատմագրության մեջ Սբ Եվստաթեոս առաքյալի անունն առավելապես հիշատակված է 18-րդ և հետագա դարերի աղբյուրներում: Վաղագույն վկայություններից մեկը հաղորդում է **Սիմեոն Երևանցի կաթողիկոսն** (1763–1780) իր հայտնի «Ջամբուռ»: Հայրապետը նույնպես Սբ Եվստաթեոսին ներկայացնում է իբրև Սբ Թադեոս առաքյալի աշակերտներից մեկը, որը Սբ Եղիշա առաքյալի հետ միասին քրիստոնեության ուսմունքն է քարոզել Երուսաղեմից մինչև Եդեսիա ու Արտագ, որտեղ էլ Սբ Թադեոսի նահատակությունից հետո. «*Սյրաթէ աշակերտն սորին ելեալ ընդ հիւսիսաւ գնայ ի Սիւնիս և անդ կայարարի բարի մահուամբ, յորոյ վերայ ևս շինեն վանք հրաշալի, որ կայ մինչև ցայսօր և կոչի Տաթևու վանք*» (Սիմեոն Երևանցի, 2022, 55): Ինչ վերաբերում է Եղիշային, ապա Երուսաղեմում Սբ Հակոբոսից եպիսկոպոս ձեռնադրվելուց հետո նա գալիս է Արտագի Սբ Թադեի վանք, այստեղից՝ Աղվանք, որտեղ էլ նահատակվում է (Սիմեոն Երևանցի, 2022, 55)⁵:

⁵ Արցախում այսօր էլ մեծ տարածում ունի Սբ Եղիշա առաքյալի պաշտամունքը, որի նշխարներն Ուռեկան ավանից տեղափոխել ու ամփոփել են. «*ի Ներամիհրայ սուրբ ուխտն, որ այժմ կոչի Զրվշրիկ*» (Մովսէս Կաղանկատուացի, 1983, 12): Հե-

Վենետիկի Մխիթարյան միաբան **Հ. Միքայել վրդ. Չամչյանցը** Սբ Եվստաթեոսին համարում է Քրիստոսի յոթանասուն (կամ յոթանասուներկու) աշակերտներից մեկը, որը եկավ Հայաստան. «...և նահապարակեալ թաղեցաւ ի տեղւոջն, որ այժմ յանուն նորա կոչի Սյրաթն, այն է՝ Տաթն» (Չամչյանց, 1985, 298–299): Այդ է փաստում նաև Սբ Էջմիածնի միաբան **Միքայել ծ. վրդ. Սալլանթեանցը՝** «Եւստաթէոս Միւննեաց» առաջնորդին ներկայացնելով իբրև առաջին դարում գահակալած եպիսկոպոսներից մեկը, որի անունը տեղադրում է նաև առաքելական հաջորդության անվանացանկում. «Սյրաթէոս առաքեալ՝ աշակերտ Թադէոսի, յամս իբր 60–80 քարոզեաց ի մեծ Հայաստան» (Սալլանթեանց, 1831, 96): Նույնն է արձանագրում նաև Սբ Էջմիածնի միաբան **Հովհաննես եպս. Շահխաթունյանցը.** «Եւստաթէոս կամ Սյրաթէ. մին յաշակերտաց սուրբ առաքելոյն Թադէոսի, որոյ ի գալն ի Հայաստան էր ընդ վարդապետին իւրոյ եւ ձեռնադրեցաւ ի նմանէ եպիսկոպոս: Եւ մնացեալ ի Հայաստան՝ քարոզեաց ի Միւնիս եւ անդ կարարեցաւ» (Շահխաթունեանց, 2014, 110): Այն ավանդաբար վավերացվել է նաև Ժամագրքերի Հայ առաքելական եկեղեցու առաջնորդների անվանացանկում, որտեղ Եվստաթեոսը դարձյալ Սբ Թադեոս առաքյալի կողմից եպիսկոպոս ձեռնադրվածներից մեկն է. «ձեռնադրութեամբ Թադէոսի առաքելոյն կարգեալ առաջին եպիսկոպոսունքն են յեղեսիս՝ Ադդէ (յամին 34), ի մեծ Հայս՝ Զաքարիա (40) և Սյրաթէոս (60)...» (Ժամագիրք, 1885, 653–654):

Հիշատակելի սրբերի շարքում Սբ Եվստաթեոսի անունը չի մոռանում վկայակոչել Կ. Պոլսի հայոց պատրիարք **Մաղաքիա արք. Օրմանյանը** (1896–1908), որի համոզմամբ. «առաքելաշաղիղ քարոզողներուն մէջ պէտք է յիշուի նաեւ Եւստաթէոս, որ ճանչցուած է իբր աշակերտ Թադէոսի, եւ անոր կողմանէ Միւննեաց առաջին եպիսկոպոս ձեռնադրուած» (Օրմանեան, 2001, սին 25): Մաղաքիա պատրիարքը նույնպես Եվստաթեոսի գերեզմանն ավանդաբար պաշտված է համարում Տաթնի վանքում՝ նշելով, որ. «Իր գործունէութեան եւ վախճանին վրայ տեղեկութիւններ չունինք, միայն գիտենք, թէ իր գերեզմանը պարուուած է Տաթնու վանքին մէջ, որուն անունն ալ Եւստաթէոսի անունէն առնուած կը կարծուի, իբր Եւստաթէի վանք» (Օրմանեան, 2001, սին 25): Այս առիթով տեղին է հիշա-

տագայում Աղվանից Վաչագան Բարեպաշտ թագավորը հուշապում է կանգնեցրել Եղիշայի նահատակության գբի վրա, իսկ թագավորի մենակյաց սենեկապանը, առանձնանալով այդ սյան վրա, ամփոփել է իր կյանքը (Մովսէս Կաղանկատուացի, 1983, 12): Մակար եպս. Բարխուդարյանցի հաղորդմամբ՝ 19-րդ դարավերջին արդեն. «անյայտացած է սինն եւ լցուած հորն, բացի մի կանգուն խութիւնից» (Բարխուտարեանց, 1999, 132):

տակել Սբ Էջմիածնի միաբան **Մեսրոպ Մագիստրոս արք. Տեր-Մովսիսյանի** նկարագրությունը, ըստ որի՝ Տաթևի վանքի պարսպից դուրս են միայն. *«...մի քանի մաքուրներ, հասարակ միաբանների գերեզմանապուր, վանքի կալն ու ժամանակաւոր հարթանոցը, ջրաղացը և ձիթահանքը»* (Տեր-Մովսիսեան, 1938, 6): Սյունյաց առաջնորդ և Տաթևի վանահայր **Արտակ եպս. Սմբատյանը** (1922–1926) հստակեցնում է վանքի պարսպից դուրս, վանական գերեզմանոցի հարավարևմտյան կողմում գտնվող կիսավեր մատուռի որպիսությունը՝ նշելով, որ ժողովուրդն այն կառուցված է համարում Եվստաթեոս առաքյալի նահատակության տեղում, սակայն. *«...հակառակ այդ աւանդութեան, ժողովուրդը այդ մաքուրը չէ յարգում իբրեւ ուխտարեղի»* (Սմբատեան, 1930, 279): Հետաքրքրական է, որ այսպես կոչված կիսավեր մատուռն այսօր էլ չունի ուխտատեղի նշանակություն և տեղացիների կողմից պարզապես կոչվում է *«Աղքատաց եկեղեցի»* (Մկրտչյան, 2010, 93), թեև կից ցուցանակին կարդում ենք. *«Սբ Եվստաթեոսի մաքուր, 5-րդ դար»*, այսինքն՝ հուշարձանն ավանդույթի ուժով վերագրվել է Սբ Եվստաթեոս առաքյալին: Ի հավելումն նշենք, որ վերականգնող-ճարտարապետներ Սամվել Այվազյանի և Ամիրան Բաղիշյանի կողմից վերջերս վերակազմվել է ենթադրյալ մատուռի նախնական ճարտարապետական հորինվածքն ու հստակեցվել կառույցի գործառնությանին նշանակությունը, որը ոչ այլ ինչ է, եթե ոչ բաց խորան ունեցող հուշակոթող, որի լավագույն զուգահեռն Աղիտուի վաղմիջնադարյան հուշարձանն է (Այվազյան և Բաղիշյան, 2024, 16–18): Տաթևի հուշակոթողի կամարակապ բաց խորան-խորշի հետնապատին ագուցված խաչքարի քանդակային լուծումները, ինչպես նաև հուշարձանի կապը բուն համալիրի հետ թույլ են տալիս արձանագրել, որ այն թվագրելի է առնվազն 9–10-րդ դարերով (Harutyunyan, 2024, pp. 9–10):

2. Ստեփանոս Օրբելյանը չի հիշատակում Սբ Եվստաթեոսին

Հակառակ վերոբերյալ հիշատակումների, Ստեփանոս Օրբելյանի Սյունյաց պատմագրքում, ինչպես վերը նշեցինք, Եվստաթեոս առաքյալի վերաբերյալ որևէ տեղեկություն չի հաղորդվում և սա այն դեպքում, երբ Սյունյաց պատմիչը երկրորդական թվացող մի շարք այլ դրվագներ մանրամասն նկարագրել-լուսաբանել է: Պատմագիրն իբրև Սյունյաց առաջին եպիսկոպոս է հիշում ոչ թե Թադեոսի կողմից ձեռնադրված Եվստաթեոսին, ինչպես հաղորդում են ուշ շրջանի աղբյուրները, այլ՝ Բարդուղիմեոսի աշակերտ և վերջինիս կողմից ձեռնադրված Կուսմսին. *«Ապա կացու-*

ցան է (Բարդուղիմեոսը – Ա. Հ.) նոցա պետուչս, զի մի՛ վերստին մոլորեացին ի կռապաշարոյսն, զոմն յաշակերպաց իւրոց Կումսի անուն, ձեռնադրեալ զնա եպիսկոպոս» (Ստեփանոս Օրբէլեան, 1910, 22), որի հիմամբ էլ Կումսի եպիսկոպոսը գլխավորում է Սյունյաց հոգևոր առաջնորդների գավազանագիրքը (Ալիշան, 1893, 326; Սմբատեան, 1930, 343):

Տաթևի վանքի հիմնադրման առիթով պատմագիրը նշում է, որ Սյունյաց եպիսկոպոսներն ընտրեցին Դիզափայտի լեռներին հանդիպակաց և բարձր դիտանոց հիշեցնող այդ վայրը. «*ուր բազմութիւնք սուրբ վկայիցս հանգուցեալ կան*» (Ստեփանոս Օրբէլեան, 1910, 202) և ուր դեռևս Ներսես Ա. Մեծ (353–373) և Սահակ Ա. Պարթև (387–436) կաթողիկոսների ժամանակներից անշուք ու անտաշ քարերով շինված փոքր եկեղեցի կար. «*և սակաւ կրօնաւորք մշտաջան ձգնութեամբ բնակէին ի նմա*» (Ստեփանոս Օրբէլեան, 1910, 202): Մեկ այլ առիթով էլ ներկայացնում է Հայր Գյուտի և ոմն քրիստոսասերի պատմությունը (գլ. ԻԱ), երբ Երասխի ափին վանք է հիմնվում, իսկ Տերը Գյուտին գորախմբից առանձնացնում է ինչպես Եվստաթեոսին (Ստեփանոս Օրբէլեան, 1910, 81), բայց այս դեպքում նկատի ունի 4-րդ դարի գործիչ Եվստաթեոս եպս. Սեբաստացուն՝ վանականության, միայնակեցության նախահորը (Ստեփանոս Օրբէլեան, 1986, 432): Ստացվում է, որ Սյունյաց պատմագիրն Թադեոս առաքյալի աշակերտ Եվստաթեոսի անունն անծանոթ է եղել կամ ինչ-ինչ պատճառներով նա փորձել է շրջանցել նրան: Թերևս հենց սա էլ հիմք է դարձել որոշ ուսումնասիրողների՝ բացառելու այդ ենթադրյալ առաքյալի և վանքի անվան միջև առկա արհեստածին կապը:

Այսպես. Ստեփանոս Օրբելյանի պատմագրքի փարիզյան հրատարակության առաջաբանում Սբ Էջմիածնի միաբան **Կարապետ վրդ. Շահնազարյանցն** առնվազն տարօրինակ է համարում այն, որ պատմահայր Մովսես Խորենացին, Ստեփանոս Ասողիկը, Հովհաննես կաթողիկոս Դրասխանակերտցին, Վանական վարդապետը և, առավել ևս, Ստեփանոս Օրբելյանն իրենց երկերում չեն հիշատակում Թադեոս առաքյալի աշակերտ, Սյունյաց առաջին եպիսկոպոս Եվստաթեոսին (Ստեփանոս Օրբէլեան, 1859, 31): Փոխարենն Օրբելյանը մանրամասն նկարագրում է Տաթևի վաղմիջնադարյան փոքր եկեղեցու տեղում, Սյունյաց առաջնորդ Հովհաննես եպիսկոպոսի օրոք և վերջինիս տեսիլքի համաձայն՝ վանքի Կաթողիկե եկեղեցու կառուցումը 895–906 թթ., որն իրագործվել է Սյունյաց իշխանների մեկենասությամբ. «*յանուն սուրբ և գլխաւոր առաքելոցն՝ վիմին Պետրոսի և առաքելոյն Պողոսի... յորոց նշխարացս եղան ի ներքոյ սեանցս*» (Ստեփանոս Օրբէլեան, 1910, 223, 225): Փորձենք պարզել, թե այս

վկայությունը, ըստ որի՝ վանքի գլխավոր եկեղեցին նվիրված է Սբ Պողոս-Պետրոս առաքյալներին և որտեղ ամփոփված են նրանց նշխարները, ինչո՞ւ է այլափոխվել կամ քողարկվել հետագա դարերի վավերագրերում:

3. Սբ Պողոս-Պետրոս առաքյալներին «փոխարինելու» եկավ Սբ Եվստաթեսը

Սյունյաց պատմագրքի վերոհիշյալ առաջաբանում Կարապետ վրդ. Շահնագարյանցը նշում է, որ 13-րդ դարի վերջերից (նկատի ունի Վարդան Արևելցուն վերագրվող հաղորդումը) Տաթևում Սբ Պողոս-Պետրոս առաքյալների փոխարեն Սբ Եվստաթեսը կամ Ստաթե առաքյալի անվան ի հայտ գալն առաջին հերթին պիտի պայմանավորել Կիլիկիայում գտնվող կաթողիկոսական աթոռի որդեգրած լատինամետ դիրքորոշմամբ, որի հետևանքով ընդլայնվեց նաև ունիթորական կամ միարարական շարժումը (Ստեփանոս Օրբելեան, 1859, 32): Գաղտնիք չէ, որ հունահռոմեական եկեղեցիների ճնշման հետևանքով Կիլիկյան հոգևոր և աշխարհիկ առաջնորդների կողմից արված դավանաբանական գիջումներն ու պապական գերիշխանության հաստատմանը միտված քայլերը լրջագույն վտանգ էին ներկայացնում՝ պառակտման եզրին կանգնեցնելով ավանդական Հայ եկեղեցին, որի անաղարտության համար մշտական պայքար են մղել, այսպես կոչված, Արևելյան վարդապետները՝ ի դեմս Սյունյաց եպիսկոպոսների (Մկրտչյան, 2013, 14): Հենց նրանք էին, որ գիտակցելով Եվրոպայից օգնություն ակնկալելու անիրական լինելը՝ ջանք չէին խնայում Ստում մեկուսացած հայրապետական աթոռը էջմիածնում վերահաստատելու ուղղությամբ, որը հաջողեցին միայն 1441 թ. (Խաչիկյան, 2017, 78): Սյունյաց մետրոպոլիտ և պրոտոֆրոնտես (նախաթոռ եպիսկոպոս) Ստեփանոս Օրբելյանի վարած քաղաքականությունն այդ պայքարի ծավալման լավագույն սկիզբը կարելի է համարել, երբ Կիլիկիայում Հեթում Բ-ի ցանկությամբ կաթողիկոսական գահը ստանձնած Գրիգոր Է Անավարզեցու (1293-1307) կրոնական նորամուծություններին⁶ Սյունյաց աթոռը մերժողական պատասխան-թուղթ է տալիս կաթողիկոսի պատվիրակ և հաջորդ Կոստանդին եպս. Կեսարացուն (Ստեփանոս Օրբելեան,

⁶ Գրիգոր Անավարզեցին և իր հաջորդ Կոստանդին Կեսարացին ընդունել էին պատարագի բաժակի մեջ ջուր խառնելու, Սբ Ծնունդը դեկտեմբերի 25-ին տոնելու պահանջները և. «խոստանայր յանձն առնուլ զոր ինչ եւ խնդրեսցեն» (Օրբելեան, 1910, 327-328):

1910, 84): Ստեփանոս Օրբելյանն այն զետեղել է նաև իր պատմագրքում՝ իբրև առանձին միավոր⁷, իսկ 1302 թ. գրում է իր հայտնի «Հակաճառութիւն ընդդէմ երկաբնակաց» աշխատությունը՝ հիմնված Սբ Գրքի և Հայ եկեղեցու հայրերի ավանդած գաղափարախոսության վրա⁸: Ասվածի առհավատյան է նաև Տաթևի վանքի երբեմնի զանգակատան զույգ զանգերից մեկի 1304 թվակիր արձանագրությունը, ուր Ստեփանոս Օրբելյանը դարձյալ հիշվում է իբրև Հայ եկեղեցու ավանդը (դավանանքը) մեծ դժվարությամբ ուղղափառ, այսինքն՝ դավանաբանական շեղումներից զերծ պահողներից մեկը. «այս Տէր Ստեփանոս Օրպէլեան, մեծաւ ջանիւ ուղղափառ պահել զաւանդս յէկեղեցիս Հայոց» (Harutyunyan, 2024, 123)⁹:

Սյունյաց աթոռի համար ունիթորական շարժումը վտանգավոր էր դարձել հատկապես 14-րդ դարի սկզբներին, երբ Նախիջևանի Երնջակ և Ծախուկ գավառներում շարժման հետևորդները քարոզչության նոր կենտրոններ էին ստեղծում: Դրան ի պատասխան, ըստ ամենայնի, Տաթևում փորձ է արվել դիվանագիտորեն քողարկելու կաթոլիկ եկեղեցու առաջադեմ սուրբ առաքյալների անունները. «ունանք ի մերոց հակառակափրաց ի ժամանակի զայրանալոյ ունիթոռութեանն ի Ծախուկ եւ յԵրնջակ՝ փոփոխմամբս այսուիկ անհետ առնել կամեցան զանուանս երկուց առաքելոցն Հռոմէական եկեղեցոյ (Պողոսի և Պետրոսի – Ա. Հ.)» (Ստեփանոս Օրբելեան, 1859, 32):

Գլաձորի համալսարանի սան Հովհաննես Քոնեցու և իր համախոհների՝ Մարաղայի եպիսկոպոս Բարդուղիմեոս Բոլոնացու, Պետրոս Արագոնացու, Հովհաննես Անգլիացու կողմից Քոնայում՝ 1330 թ. հրավիրված ժողովը նոր կանոնադրություն է ընդունել, որի հիմամբ կազմվել է Հովհաննես Քոնեցու հայտնի շրջաբերականը, ըստ որի՝ հիմնվում է «Կարգ միաբանողաց եղբարց Սբ Գրիգորի Լուսաւորչին» միաբանությունը, որի նպատակը Հայոց եկեղեցին հռոմեա-կաթոլիկականի հետ միավորելն էր (Այվազյան, 2008, 45; Հարությունյան, 2014, 387): Անշուշտ, նրանց դեմ դավանաբանական մշտական պայքարի մեջ էին նաև Սյունյաց աթոռին Ստեփանոս Օրբելյանին հաջորդած մետրոպոլիտները՝ Հովհաննես-Օր-

⁷ «ԿԹ. Թուրթ վասն հաւարոյ եւ կարգաց եկեղեցոյ յարեւելեան աշխարհէս առ կաթողիկոսն Հայոց Տէր Գրիգոր, գրեալ ձեռամբ Տեառն Ստեփաննոսի՝ Սինեաց եպիսկոպոսի, ընդ նմին եւ դաւանութիւն ուղղափառ հաւարոյ սրբոցն Գրիգորի Սքանչելագործի եւ Աթանասի Աղեքսանդրացոյ» (Օրբելեան, 1910, 449-467):

⁸ Այդ աշխատությունը հայտնի էր Կ. Պոլսի 1756 թ. հրատարակությամբ, մինչդեռ վերջերս հրատարակվեց նաև արևելահայերեն փոխադրմամբ (Օրբելյան, 2023, 5):

⁹ Հետաքրքիրն այն է, որ չնայած իր եռանդուն պայքարին, Ստեփանոս Օրբելյանն իր պատմագրքում հավատարիմ է մնացել ճշմարտությանը, և Սբ Պողոս-Պետրոսին արհեստականորեն չի փոխարինել Սբ Եվստաթեոսով:

բելն ու Ստեփանոս-Տաբասիձը, ինչպես նաև՝ Գլաձորի րաբունապետ Եսայի Նչեցին: Նշելի է Գրիգոր Անավարզեցու հաջորդ Կոստանդին Գ Կեսարացուն (1307–1322) ուղղված նամակը, որտեղ հիշյալ առաջնորդներն իրենց անհնազանդությունն են հայտնել Կիլիկիայի միարարական ձգտումներին (Մկրտչյան, 2013, 100):

Նկատենք, որ 14–15-րդ դդ. Քոնստն հայտնի է դարձել նաև իր դպրոցով, ուր թարգմանվել ու ընդօրինակվել են անտիկ մտածողների, փիլիսոփաների իմաստասիրական երկեր, դասավանդվել ու զարգացել է գրչարվեստը (Այվազյան, 2008, 45–46), սակայն, դավանաբանական առումով կաթոլիկ միաբանության ստեղծումն ու զարգացումը Հայաստանում չէր կարող խրախուսվել Հայ եկեղեցու կողմից և կարող էր ուղակիորեն նպաստել Հռոմի կաթոլիկ եկեղեցու երկու նշանավոր առաքյալների՝ Պողոսի և Պետրոսի անունների փոխարինմանն այլ սրբանվամբ, որ տվյալ դեպքում Տաթև տեղանվանը հարիր և Սբ Թադեոսին համադիր առաքելաշնորհ Սբ Եվստաթեոսն է: Անվանափոխության երկրորդ պատճառն ըստ Կարապետ վարդապետի՝ ուղակիորեն կարող էր անունների մերձավորությամբ առաջացած շփոթի հետևանք լինել, ըստ որի՝ Տաթևն առաջացել է Եվստաթե-Ստաթեից, ուստի Տաթևը համապատասխանեցրին Եվստաթեին (Օրբելեան, 1859, 32–33):

Հետևելով Կարապետ վրդ. Շահնազարյանցի վերոհիշյալ նկատառումներին՝ **Հ. Ղևոնդ Ալիշանը** ևս քննադատաբար է մոտենում խնդրին և, կարելի է ասել, ժխտում է Տաթև-Եվստաթեոս անվանական կապը՝ պատճառաբանելով, թե Ստեփանոս Օրբելյանի պատմագրքում այդանուն սրբի մասին որևէ հիշատակություն չկա: Ավելին՝ նրա վարքը չի ընդգրկվել Հայսմավուրքում կամ այլ վկայաբանական ժողովածուներում, ինչից ենթադրում է, որ Եվստաթեոսը. *«ոչ միայն անձանօթ է այլոց եկեղեցեաց, այլ և ի մեր իսկ Յայսմաւորս ոչ գտանի օր տօնի նորա, այլ միայն ի յիշարակի այլոց ոմանց Սրբոց ի հարեանցի...»* (Ալիշան, 1893, 224): Նա նույնիսկ դիտարկում է Եվստաթեոսի կամ Ստաթեի անվան փոխարեն Թադեոսի կամ Թադեի անվան հավանականությունը, քանի որ *«շար երկբայական է այդ անձն (Եվստաթեոսը – Ա. Հ.), ոչ միայն, որ յօրարաց չի յիշուիր, այլ և ոչ ի Վանականէ, որ բոլոր Հայոց աւելարարանիչ Առաքեալներն և Աշակերտները նշանակած է»* (Ալիշան, 1901, 23–24): Ի դեպ, ինչպես Սյունիքում Եվստաթեն, այնպես էլ Արցախում Դադո-Դադի-Դադուն, ձեռագրերի հիշատակարաններում երբեմն Թադեոս առաքյալին անվանամերձ են հիշվում, ինչը կարծես թե հավաստի է դարձնում Ալիշանի կոահումը, որը մենք ևս չենք բացառում: Օրինակ՝ Տաթևի վանքը ձեռագրերի

հիշատակարաններում երբեմն վկայված է Դաթե (ՄՄ 8505), Սդաթե (ՄՄ 2441), Ըստթադե (ՄՄ 360, 785, 4823), Ըստաթե (ՄՄ 4061) անվանաձևերով, իսկ **Միքայել Ասորու** ժամանակագրության հայերեն խմբագրյալ թարգմանության վերջին՝ «Յաղագս քահանայութեան» մասում Դադիվանքն ուղղակիորեն առաքելադիր վանք է ներկայացվում, որտեղ Դադին Թադետոն է՝ յոթանասունից մեկը, Թադեի աշակերտը. *«Թադէնու, մի յեթանասանիցն, որ գնաց հրամանաւ Թադէի՝ ի Մեծն Հայք, և ի կողմանս հիւսիսոյ և լուեալ զմահն Աբգարու և դարձաւ և եմուր ի Փոքր Սիւնիք և կրօնաւորեալ անդէն ծածկաբար վախճանեցաւ և տեղին շինեցաւ վանք և յանուն նորա կոչեցաւ»* (Միխայել Ասորի, 1871, հաւելում 33): Նկատելի է, որ ինչպես Տաթևի, այնպես էլ Դադիվանքի հիմնադրման ավանդության հիմքում սրբերի անունները Թադետոսի անվան հետ ինչ-որ կերպ հարմարեցնելու միտում է եղել, որտեղ անվանադիր սրբերը հանդես են գալիս հայ առաքելական եկեղեցու հիմնադիր առաքյալի՝ Թադետոսի աշակերտի «կարգավիճակում»՝ ընդհուպ մինչև քարոզչության ու նահատակության տեսարանները: Տարբերությունն այն է, որ եթե Դադիի դեպքում կարելի է հավանական համարել, որ ավանդության հիմքում 12-րդ դարի վերջերից սկիզբ առած Զաքարյանների գլխավորած ազատագրական «սրբազան» պայքարն էր՝ համաքրիստոնեական աշխարհի ազատագրման առաքելականությունը (Պետրոսյան, 2017, 236-237)¹⁰, ապա Տաթևի պարագայում, մեր համոզմամբ, խնդրի պատասխանը պետք է որոնել ունիթորական կամ միարարական շարժման հնարավոր վտանգից, ինչու չէ նաև առաքյալների նշխարները հափշտակումից ապահովագրելու նպատակով հյուսված ավանդության մեջ, երբ առաքելացրել ու Տաթև տեղանվան հետ են հարմարեցրել Թադետոսից բխող Եվստաթետոս – Եվստաթե – Ստաթեին՝ ընդգծելով Սյունյաց եպիսկոպոսանիստ կենտրոնի առաքելադիր լինելը:

¹⁰ Հնագետ Համլետ Պետրոսյանի բնորոշմամբ՝ ազատագրական այս «սրբազան» պատերազմում արագ հզորացող իշխանական տներն իրենց պայքարում տեղական սրբերը փոխարինել են համաքրիստոնեական սրբերով, ինչպես Վերին Խաչենի կամ Հաթերքի տերերը վերհանել են Դադոյի կամ Դադեի կերպարը. «հիմքում ունենալով նրա անվան նմանությունը սուրբ Թադե-Թադետոսին և թերևս տեղական ինչ-ինչ ավանդազրույցներ» ([Պետրոսյան], Դադիվանք. Սուրբ Դադիի և նրա գերեզմանի մասին –

<https://monumentwatch.org/hy/monument/%D5%A4%D5%A1%D5%A4%D5%AB%D5%BE%D5%A1%D5%B6%D6%84%D5%BD%D5%B8%D6%82%D6%80%D5%A2%D5%A4%D5%A1%D5%A4%D5%AB%D5%AB%D6%87%D5%B6%D6%80%D5%A1%D5%A3%D5%A5%D6%80%D5%A5%D5%A6%D5%B4%D5%A1%D5%B6%D5%AB-%D5%B4/> – մուտք 22.12.2024):

Առաքյալներին վերագրվող սրբազան ավանդությունները միջնադարյան աղբյուրներում հաճախադեպ են: Դադիվանքին զուգահեռ կարելի է հիշատակել նաև Սբ Եղիշա առաքյալի պաշտամունքն Արցախում, որի նախատիպը, ըստ էության, Վարդան Մամիկոնյանի զինակից Եղիշե վարդապետն էր (Խառատյան, 2001, 58), իսկ Կարենիսում՝ Սբ Մատթեոս և Սբ Անդրեաս առաքյալներին նվիրված վանքի վաղմիջնադարյան թաղածածկ եկեղեցու ստորգետնյա դամբարանի արևելյան խորշում այսօր էլ պահպանվել է սրբոց մասունքներն ամփոփած երկմաս քարատապան-մասունքարանը (Միրիջանյան, 2017, 183-184): Ի դեպ, պատմագիր Առաքել Դավրիժեցին մանրամասն նկարագրել է 17-րդ դարում Կարենիսում հիշյալ առաքյալների մասունքների հափշտակումը ֆռանկ (կաթոլիկ) հայրերի կողմից, որը կանխել են տեղի վանականները (Դավրիժեցի, 1990, 168): Նույնը տեղի է ունեցել նաև Վաղարշապատում, երբ ֆռանկ կրոնավորները հափշտակել են Սբ Հռիփսիմեի մասունքներն ու տարել Սպահան (Առաքել Դավրիժեցի, 1990, 168-181): Թերևս այդ նույն երևույթի հետևանք պիտի համարել նաև Սյունիքում՝ հատկապես Գորիսի տարածաշրջանում Սբ Հռիփսիմեի և Սբ Մինասի պաշտամունքի աննախադեպ տարածումը 17-րդ դարում, որի առիավատյան հիշյալ սրբերի անվանակիր եկեղեցիների զանգվածային կառուցումն էր տարբեր բնակավայրերում (Խնձորեսկ, Վերիշեն, Հալիձոր, Հարժիս, Տաթև, Տանձատափ և այլն):

Սբ. Եվստաթեոս առաքյալին վերագրվող հայտնի ավանդությունն անստույգ է համարում նաև ազգագրագետ **Երվանդ Լալայանը**: Նա նույնպես նկատում է, որ Օրբելյան պատմագիրն այդ մասին ոչինչ չի հաղորդում, բացի այդ՝ վստահ չէ, որ Թադեոս առաքյալն այդանուն աշակերտ է ունեցել և, որ կարևորն է, Տաթև տեղանունը պիտի գոյություն ունեցած լիներ շատ ավելի վաղ, քանզի «Ներսեսյան» գահնամակում հիշվում են նաև Տաթևյանք (Լալայան, 2021, 13): Ե. Լալայանի հիշատակած գահնամակի առիթով ասենք, որ «Ներսեսյան» գահնամակը, որը նաև «Կեղծ» գահնամակ է կոչվում՝ Սահակ Պարթևին վերագրվող բուն գահնամակից տարբերելու համար, մեզ է հասել 10-րդ դարի մատենագիր Մեսրոպ երեց Վայոցձորեցու «Պատմութիւն սրբոյն Ներսիսի Հայոց հայրապետի» խորագրով երկում, որը գրվել է 967 թ. և հայտնի է նաև Ներսես Ա. Պարթև կաթողիկոսի «Վարք» անվամբ: Բնագրում հիշատակված է Ներսես կաթողիկոսի վերահաստատած Հայոց իշխանների գահացանկը՝ 167 անուն, որի 145-րդը՝ «Տաթևեանք» (Մեսրոպ Վայոցձորեցի, 2010, 685; Յակոբեան, 2011, 493-494): Այսինքն՝ առնվազն 4-5-րդ դդ. Տաթև տեղանվանաձևն արդեն իսկ կենցաղավարել է, որպիսին այն հիշվել է գահնա-

մակում և քանիցս վկայակոչվել նաև Ստեփանոս Օրբելյանի պատմագրքի՝ 9-10-րդ դդ. տեղի ունեցած հիշարժան դեպքերի առիթով: Դրանցից ակնառու են 9-րդ դարասկզբին Սյունյաց եպիսկոպոսության աթոռանիստը Շաղատից Տաթև փոխադրվելուց հետո տեղի Դավիթ եպիսկոպոսի կողմից 839 թ. իշխան Փիլիպպեից 10.000 դրամով Արծիվ գյուղն ու Բերդկաներեչ ագարակն ապահարկ գնելու, իսկ արդեն 844 թ. Տաթև գյուղը միևնույն իշխանի կողմից վանքին նվիրաբերելու և վանքապատկան դարձնելու իրադարձությունները (Ստեփանոս Օրբելեան, 1910, 204-208):

Պակաս կարևոր չէ նաև այն հանգամանքը, որ Ստեփանոս Օրբելյանն իր պատմագիրքը շարադրելիս, ինչպես ինքն է վկայում, օգտվել է թագավորական հրովարտականից, դիվանական վավերագրերից, կավածագրերից, վիմագրերից ու ձեռագրաց հիշատակարաններից (Օրբելեան, 1910, 10), այսինքն՝ նշված գրավոր աղբյուրներում պատմագիրը Եվստաթեսի մասին որևէ հիշատակություն չի գտել, իհարկե, եթե բացառենք պատմագրի՝ Եստաթեսին միտումնավոր չհիշատակելու մոտեցումը: Դրանում համոզվելու համար փորձենք ինքներս վերանայել Տաթևի վիմագրերում, ինչպես նաև այս գրչակենտրոնում ընդօրինակված ու պահված ձեռագրերի հիշատակարաններում վանքի ու առաքյալի անունների միջև առկա հնարավոր աղերսը:

4. Մբ. Եվստաթեսու առաքյալը՝ վիմագիր և ձեռագիր աղբյուրներում

Տաթևի վանքից մեզ հասած վիմագրերում Եվստաթեսու առաքյալի անունն ուղղակիորեն վկայված չէ, փոխարենը վանքի 13-14-րդ դդ. շուրջ մեկ տասնյակ վիմագրերում, ինչպես նաև 1532 թվակիր մեկ այլ նվիրագրում վանքի Կաթողիկեն հիշվում է *Մբ Առաքելոց*, իսկ վանքն ու տեղանունը՝ *Տաթև*, երբեմն էլ՝ *Մբ ուխտ (վանք-միաբանություն)* կամ *առաքելական աթոռ* անուններով (Դիվան հայ վիմագրության, 1960, 15-16, 21, 26, 27, 30; Harutyunyan, 2024, 59, 62, 65, 67, 74, 77, 78, 115): Օրինակ՝ Կաթողիկե եկեղեցու հարավային մույթի հյուսիսային նիստի 1274 թ. կիսաեղծ վիմագրում Տարսայիձ Օրբելյանը վկայում է. «միաբանեցայ Տաթետոյ Սուրբ Առաքելոցս» (Դիվան հայ վիմագրության, 1960, 15-16; Harutyunyan, 2024, 59), կամ միևնույն մույթի արևմտյան նիստի 13-րդ դարի երկրորդ կեսով թվագրվող ընդարձակ նվիրագրում Տեր Աբրահամ եպիսկոպոսը հայտնում է, որ. «Ժամանեցա Տաթետու Առաքելոց Մբ եկեղեցիս» (Դիվան հայ վիմագրության, 1960, 16; Harutyunyan, 2024, 62): Ակնհայտ է, որ հիշյալ օ-

րինակներում *Տաթև* անվանաձևն օգտագործվել է վանքի և տեղանվան համար միաժամանակ, իսկ բուն եկեղեցին՝ *Սբ Առաքելոց*՝ առանց հատկանշելու ենթադրյալ գույգ առաքյալների անունները:

Ինչ վերաբերում է ձեռագիր աղբյուրներին, ապա կարելի է ասել, որ 13-րդ դարից վաղ թվագրմամբ մատյաններ Տաթևից մեզ չեն հասել. դրա հիմնական պատճառը նախ 1170 թ. սելջուկյան ամիրա Ելտկուզ աթաբեկի հրոսակների կողմից Բաղաբերդի գրավումն է, երբ ոչնչացվեց նաև Տաթևի վանքից բերդում ի պահ տրված ավելի քան 10.000 ձեռագիր (Օրբելեան, 1910, 336), իսկ 20-րդ դարասկզբին տեղի վանահոր կողմից մի շարք ձեռագրեր են այրվել: Այս վերջին սոսկալի տեղեկությունն ավանդած Մեսրոպ Մագիստրոսն ուղղակիորեն չի նշում այդ վանահոր անունն ու նրա այրած ձեռագրերի թվաքանակը (Տէր-Մովսիսեան, 1938, 20), մինչդեռ ձեռագրագետ Օսիկ Եգանյանին հետազայում հաջողվել է Մաշտոցյան Մատենադարանում պահվող մի վավերագրի վերջին ին փաստագրել Մեսրոպ Մագիստրոսի ձեռքով նշված մի գրություն, ըստ որի՝ հիշյալ ձեռագրերն այրած վանահայրը Ներսես վրդ. Մելիք-Թանգյանն է, իսկ ձեռագրերի ընդհանուր թիվը՝ 64, որոնք իբր անպիտան ու քայքայված են համարվել (Եգանեան, 2014, 53):

Թեև ակնհայտ մեծաթիվ ձեռագրական կորուստներին, մեզ է հասել Տաթևում գրված և տեղի գրատանը պահված շուրջ 300 ձեռագիր մատյան: Այդ ձեռագրերի գրեթե կեսն ընդօրինակվել է Տաթևում և համանուն անապատներում (Հալիձորի Հարանց և Տաթևի Մեծ), որոնցից ավելի քան 100-ն ունեն գրչության խոսուն հիշատակարաններ: Դրանց հիմամբ կարող ենք արձանագրել, որ 1282-1864 թթ. ընդգրկող ժամանակաշրջանում Սբ Եվստաթեոս-Եվստաթե-Ստաթե առաքյալի անունը վկայված է միայն 15-րդ դարից սկսած, առավելապես Գրիգոր Տաթևացու ռաբունապետության և համալսարանի գործունեության ծաղկման շրջանում, երբ աշխուժացել էր նաև տեղի գրչական կյանքը: Այս առումով հետաքրքիր են հիշատակարաններում գրչավայրը տեղորոշող ձևակերպումները, որոնք հաճախ կաղապարված բնույթ ունեն: Մեր ուսումնասիրած օրինակների հիմամբ կարող ենք ընդհանուր առմամբ ասել, որ գրչության վայրը հատկանշելիս՝ գրիչները, ընդունված կարգի համաձայն, հիմնականում վկայաբերել են ինչպես բուն վանքի, այնպես էլ նրա երեք սուրբ եկեղեցիների անունները՝ վանքն ու միաբանական ուխտը բնութագրելով Սբ Եվստաթե կամ Ստաթե առաքյալի անվամբ, իսկ Կաթողիկե եկեղեցին՝ ոչ թե Սբ Պողոս-Պետրոս, այլ ընդհանրական՝ Սբ Առաքելոց (երբեմն՝ Առաքելոյ)՝ առանց ընդգծելու առաքյալների անունները: Կան ձեռագրեր, որոնց հիշա-

տակարաններում վանքի Կաթողիկե եկեղեցին ևս ուղղակի Սբ Եվստաթե առաքյալի անունով է վկայված: Հետաքրքրական է, որ Կաթողիկեն երբեմն հիշվում է նաև Սբ Նշան (Սբ Խաչ) անունով, որ, թերևս, եկեղեցու տեղում ավելի վաղ գոյություն ունեցած փոքր եկեղեցու անունն էր: Վանքի մյուս երկու եկեղեցիները հիշատակարաններում վկայված են իրենց իսկ անուններով՝ Սբ Գրիգոր Լուսավորիչ և Սբ Աստվածածին: Թերևս բացառություն են 17-րդ դարում գործած Մինաս Երզնկացի գրչի թողած 1613 թվակիր հիշատակարաններում Կաթողիկե եկեղեցին նաև Սբ Պողոս-Պետրոս առաքյալների անվամբ հիշատակումները (ԺԷ դ. հիշ./Ա, 1974, 482-484)¹¹, կամ ծագումով Տաթևի վանքից Հայաստանի պատմության թանգարանում պահվող ասեղնագործ զույգ ուրարների արձանագրություններում (1738 թ.) նաև վանքի գլխավոր առաքյալների՝ Սբ Պողոսի և Սբ Պետրոսի անունների վկայված լինելը (Մուշեղյան, 1964, 99): Մի երևույթ, որը թույլ է տալիս արձանագրել, որ տևական դադարից հետո Տաթևում դարձյալ վերականգնվել է Սբ Պողոս-Պետրոս առաքյալների անունները հիշատակելու ավանդույթը:

Եզրակացություններ

Սյունյաց պատմագիր Ստեփանոս Օրբելյանը մանրամասն նկարագրում է Տաթևի վանքի Կաթողիկե եկեղեցու կառուցումն ու Սբ Պողոս-Պետրոս առաքյալների նշխարների ամփոփումը տաճարի զույգ մույթերի հիմքերում՝ չհիշատակելով Քրիստոսի կամ Սբ Թադեոսի ենթադրյալ աշակերտ Սբ Եվստաթեսու - Եվստաթե - Ստաթեին: Վերջինիս անունը վկայված չէ նաև վաղ շրջանի մատենագրական և վարքագրական աղբյուրներում:

Պետք է արձանագրել, որ Տաթևի վանքի՝ ավանդաբար Եվստաթեսի վանք կամ ուխտ (միաբանություն) բնորոշումը գրավոր աղբյուրներում 15-րդ դարից վաղ չէ, հատկապես, երբ նկատի ենք առնում Վարդան Արևելցուն վերագրվող մեզ հասած «Աշխարհացոյց»-ի՝ ուշ շրջանի ընդօրինակություն լինելը:

Սբ Պողոս-Պետրոս առաքյալների անունների քողարկումն ու վանքը ենթադրյալ Սբ Եվստաթեսու առաքյալի անվան հետ զուգակցելը կարելի է

¹¹ Սբ Պողոս-Պետրոս առաքյալների անունների քողարկման փաստի առնչությամբ ուշագրավ է նաև Երևանի եպիսկոպոսանիստ Սբ Պողոս-Պետրոս եկեղեցու՝ ձեռագրերում համատարած Երկուերեսնի մականվամբ հիշատակվելը (Հարությունյան, 2021, 87-88):

համարել ժամանակի եկեղեցաքաղաքական պայմանների թելադրանք, երբ Սյունիքում ակտիվորեն տարածվում էր ունիթորական շարժումը՝ Նախիջևանի Քոնա կենտրոնով, ինչը դավանաբանական առումով լրջագույն սպառնալիք էր ավանդական Հայ եկեղեցուն: Այս տեսանկյունից, թերևս, սխալված չենք լինի, եթե ասենք, որ այդ էր Սյունյաց հոգևոր և եպիսկոպոսանիստ կենտրոնն առաքելադիր հռչակելու հիմնական պատճառը:

Տաթև տեղանունը քանիցս հիշվում է մատենագրական և վիմագրական աղբյուրներում, որոնցից վաղագույնը, թերևս, «Ներսեսյան» գահնամակում պահպանված տոհմանունն է՝ «Տաթևյանք», ապա նաև՝ Օրբելյանի վկայությունները, 13-14-րդ դդ. ձեռագրերն ու վանքի ժամանակամերձ վիմագրերը, այսինքն՝ Տաթև տեղանունը վավերացվում է դեռևս վաղ միջնադարում և հետագա դարերում:

Սբ Եվստաթեոսի անվան շուրջ հյուսված ավանդության ու դրա կրոնական-քաղաքական դրդապատճառներից զատ, վանքի Կաթողիկեն այսօր նորից իր սուրբ առաքյալների՝ Պողոսի և Պետրոսի անունն է կրում, իսկ Սբ Եվստաթեոսի անվան հետ են կապում միայն վանքի պարսպից դուրս՝ հյուսիսարևելյան կողմում գտնվող կիսավեր հուշակոթողը: Մերօրյա ուսումնասիրությունները հստակեցնում են այդ կառույցի ճարտարապետական հորինվածքն ու զուգահեռը Աղիտուի վաղմիջնադարյան հուշակոթողի հետ (Այվազյան, Բադիշյան, 2024), միայն թե թվագրման հարցում մենք հավանական ենք համարում 9-10-րդ դդ.՝ ժամանակամերձ Կաթողիկե եկեղեցու շինարարությանն ու ձոճվող-սյան կանգնեցմանը: Դա մի ժամանակաշրջան էր, երբ վանքի վերագարծոնքին ընդառաջ՝ Սյունիքում փորձեր արվեցին վերականգնելու վաղ միջնադարում ավանդական դարձած կոթողային հուշարձանների հորինվածքային ձևերը՝ հուշակոթողներ, քառանիստ կոթողներ և այլն, որոնք, սակայն, մասնավոր օրինակներից զատ (Որոտնավանք, Ցաղաց քար և այլն), լայն տարածում այդպես էլ չգտան:

Արսեն Է. Հարությունյան – վիմագրագետ, գրադվում է հայ միջնադարյան գրավոր ժառանգության ուսումնասիրությամբ: Հետաքրքրությունների շրջանակն ընդգրկում է միջնադարյան Հայաստանի և գաղթավայրերի պատմության աղբյուրագիտությունը, միջնադարյան հնագիտությանն ու ձեռագրագիտությանն առնչվող խնդիրները: Հեղինակ և համահեղինակ է 11 գրքի և ավելի քան 100 գիտական հոդվածի:

Գրականության ցանկ

1. **Ալիշան, Ղ. (1893).** Միասական. տեղագրություն Միսնես աշխարհի: Վենետիկ: Սբ Ղազար:
2. **Ալիշան, Ղ. (1901).** Արշալոյս քրիստոնէութեան հայոց: Վենետիկ: Սբ Ղազար:
3. **Աճառյան, Հ. (1944).** Հայոց անձնանունների բառարան (հատ. Բ): Երևան: Պետական համալսարանի հրատարակչություն:
4. **Այվազյան, Ա. (2008).** Նախիջևանի վիմագրական ժառանգությունը (հատ. Դ), *Երնջակ գավառ*: Երևան: «Գասպրինտ»:
5. **Այվազյան, Ս., և Բաղիշյան, Ա. (2024).** Տաթևի հուշակոթողի ճարտարապետությունը և ամրակայման նախագծի հայեցակարգը, «Վարձք», 19 (9-20): Երևան: ՀՀՈՒ հիմնադրամ:
6. **Անթապյան, Փ. (1987).** Վարդան Արևելցի. կյանքն ու գործունեությունը (գիրք Ա): Երևան: ՀՍՍՀ ԳԱ հրատարակչություն:
7. **Առաքել Դարիժեցի (1990).** Գիրք պապոնություն: Լ. Խանլարյանի (աշխ.): Երևան: ՀԽՍՀ ԳԱ հրատարակչություն:
8. **Բաթխուտարեանց, Մ. եպս. (1999).** Աղուանից երկիր և դրացիք. Արցախ: Պ. Չոբանեան (կազմող): Երևան: «Գանձասար»:
9. **Դիվան հայ վիմագրության (1960).** Գորիսի, Սիսիանի և Ղափանի շրջաններ, (պրակ II): **Ս. Բաթխուտարյան** (կազմող): Երևան: ՀՍՍՌ ԳԱ հրատարակչություն:
10. **Եզանեան, Օ. (2014).** Տաթևի գրատան ձեռագրերը, «Աշխարհություններ»: Գ. Տէր-Վարդանեան (հրատ. պատրաստող), (50-61): Երևան: «Նաիրի»:
11. **Ժամագիրք (1885).** Ժամագիրք Հայաստանեայց սուրբ եկեղեցւոյ՝ արարեալ սրբոց թարգմանչացն մերոց Սահակայ եւ Մեսրոպայ եւ երանելի հայրապետացն մերոց Գիւրոյ եւ Յովհաննու Մանդակունոյ եւ Սրբոյ Ներսիսի Շնորհալոյ: Վաղարշապատ: Ի տպարանի Սրբոյ Կաթողիկէ Էջմիածնի:
12. **Ժէ դ. հիշ./Ա (1974).** Հայերեն ձեռագրերի Ժէ դարի հիշատակարաններ (հատ. Ա, 1601-1620): Ա. Հովհաննիսյան և Վ. Հակոբյան (կազմողներ): Երևան: ՀՍՍՀ ԳԱ հրատարակչություն:
13. **Լալայան, Ե. (2021).** Երկեր (հատ. 4): Ս. Հոբոյան (կազմող): Երևան: ՀԱԻ հրատարակչություն:
14. **Խաչիկյան, Լ. (2017).** Արտագի հայկական իշխանությունը և Ծործորի դպրոցը, «Աշխարհություններ» (հատ. Բ), Շ. Խաչիկյան (կազմող), Պ. Մուրադյան (խմբ.), (51-156): Երևան: «Նաիրի» հրատարակչություն:
15. **Խառատյան, Հ. (2001).** Եղիշե առաքյալը և նրա առաքելությունը, «Հայոց սրբերը և սրբավայրերը»: Ս. Հարությունյան և Ա. Բալանթարյան (խմբ.), (49-60): Երևան: «Հայաստան»:
16. **Հարությունյան, Ա. (2021).** Հին Երևանի եպիսկոպոսանիստ եկեղեցին. Երկուերեանի-Սբ Պողոս-Պեպրոս: Սբ Էջմիածին: Մայր Աթոռ Սբ Էջմիածնի հրատարակչություն:

17. **Հարությունյան, Գ. (2014).** *Դավանաքանական և քաղաքական պայքարը – Հայոց պատմություն* (հատ. 2): Վ. Բաթխուդարյան և այլք (խմբ. խորհուրդ), գիրք II, Միջին դարեր (IX դարի կես – XVII դարի առաջին կես), (383–388): Երևան: «Զանգակ»:
18. **Ղանալանյան, Ա. (1969).** *Ավանդապատում*: Երևան: ՀՍՍՀ ԳԱ հրատարակչություն:
19. **Միխայել Ասորի (1871).** *Ժամանակագրություն* տեառն **Միխայելի Ասորուց** պատրիարքի: Երուսաղէմ: Ի տպարանի Սրբոց Յակովբեանց:
20. **Միրիջանյան, Գ. (2017).** Կարենիսի վանքի Անդրեաս և Մատթեոս առաքյալների սարկոֆագ–մատուռքարանը, «Հայաստանը և արևելաքրիստոնեական քաղաքակրթությունը. Բ», հայագետ–բյուզանդագետ Կարեն Յուզբաշյանի ծննդյան 90–ամյակին նվիրված միջազգային գիտաժողով, զեկուցումներ և զեկուցումների դրույթներ, (182–186): Երևան: ՀՀ ԳԱԱ «Գիտություն» հրատարակչություն:
21. **Մկրտչյան, Ա. եպս. (2013).** *Մյունխաց մեպրոպոլիսական աթոռը Օրբելյանների իշխանության ժամանակաշրջանում*: Երևան: Պատմության ինստիտուտ:
22. **Մկրտչյան, Վ. արք. (2010).** Տաթև վանական համալիրի եկեղեցիների հիմնումը, « *Էջմիածին*», 2010, Զ (92–103): Սբ Էջմիածին: Մայր Աթոռ Սբ Էջմիածնի հրատարակչություն:
23. **Մեսրոպ Վայոցձորեցի (2010).** *Մեսրոպայ երիցու Վայոցձորեցույ Պատմություն Սրբոյն Ներսիսի Հայոց հայրապետի*: Գ. Տէր–Վարդանեսան (աշխ.), «Մատենագիրք Հայոց» (ԺԱ հատոր, Ժ դար, գիրք Ա, 631–746): Աթիլիաս–Լիբանան: Կիլիկիոյ Հայոց կաթողիկոսութիւն:
24. **Մովսէս Կաղանկատուացի (1983).** *Պատմություն Աղուանից աշխարհի*: Վ. Առաքելյան (աշխ.): Երևան: ՀՍՍՀ ԳԱ հրատարակչություն:
25. **ՄՅՀՀ Ի Վենետիկ (1924).** Մայր ցուցակ հայերէն ձեռագրաց Մատենադարանին Մխիթարեանց Ի Վենետիկ (հ. երկրորդ): Բ. վրդ. Սարգիսեան (կազմող): Վենետիկ: Մխիթարեան ուխտէն:
26. **Մուշեղյան, Ե. (1964).** Հատկանշական ցուցակ թանգարանային ժողովածուների (պրակ 1), Հայերեն արձանագրությամբ առարկաներ: Ե. Մուշեղյան (աշխ.): Երևան: ՀՍՍՌ ԳԱ հրատարակչություն:
27. **Յակոբեան, Ալ. (2011).** «Գահնամակ ազատաց եւ տանուտէրանց Հայոց» եւ «Զաւրանամակ», «*Բազմավէպ*», 2011, 3–4 (485–550): Վենետիկ: Սբ Ղազար:
28. **Յայսմաուրք (1730).** *Գիրք, որ կոչի Այսմաուրք, որ պարունակէ յինքեան զճառս վարուց սրբոց եւ զնահապարակութիւնս երանելի մարտիրոսացն եւ վկայից Քրիստոսի Աստուծոյ մերոյ*: Կ. Պօլիս: Ի տպարանի Գրիգոր դպրի Մարսըրանեցոյ:
29. **Շահխաթունեանց, Յովհ. եպս. (2014).** *Սյորագրութիւն Կաթողիկէ Էջմիածնի եւ հինգ գաւառացն Արարաբայ*: Ա. Տէր–Ստեփանյան (աշխ.): Սբ Էջմիածին: Մայր Աթոռ Սբ Էջմիածնի հրատարակչություն:
30. **Չանչյանց, Մ. (1985).** *Հայոց պատմություն (սկզբից մինչև 1784 թվականը)*, (հատ. Ա): Երևան: ԵՊՀ հրատարակչություն:

31. **Պետրոսյան, Հ. (2017).** Վաճառի Սուրբ Ստեփանոս վանքի պեղումները և համաքրիստոնեական արքերի ու մասուքների արդիականացման խնդիրները 13-րդ դարում, «*Հայաստանը և արևելաքրիստոնեական քաղաքակրթությունը. Բ*», հայագետ-քյուզանդագետ Կարեն Յուզբաշյանի ծննդյան 90-ամյակին նվիրված միջազգային գիտաժողով, գեկուցումներ և գեկուցումների դրույթներ (228-234): Երևան: ՀՀ ԳԱԱ «Գիտություն» հրատարակչություն:
32. **[Պետրոսյան, Հ.].** Դադիվանք. Սուրբ Դադիի և նրա գերեզմանի մասին – <https://monumentwatch.org/hy/monument/%D5%A4%D5%A1%D5%A4%D5%AB%D5%BE%D5%A1%D5%B6%D6%84%D5%BD%D5%B8%D6%82%D6%80%D5%A2%D5%A4%D5%A1%D5%A4%D5%AB%D5%AB%D6%87%D5%B6%D6%80%D5%A1%D5%A3%D5%A5%D6%80%D5%A5%D5%A6%D5%B4%D5%A1%D5%B6%D5%AB-%D5%B4/> – մուտք 22.12.2024):
33. **Սալլանթեանց, Մ. ծ. վրդ. (1831).** *Կրօնագիտություն քրիստոնեական ըստ ուղղափառ դասնության առաքելական եկեղեցւոյ լուսատոքակրօն հայոց:* Ի Մոսկով: Ի տպարանի Հայկական ձեռնարանի տեարց Լազարեանց:
34. **Սիմեոն Երևանցի (2022).** *Ջամբռ:* Հ. Օհանյան (աշխ.): Երևան: Մատենադարան:
35. **Սմբատեան, Ա. եպս. (1930).** Համառոտ պատմություն Տաթևի վանքի, «*Տաթև*» Կարեգիրք գրականության և արուեստի, Զ. տարի (276-350): Հալէպ-Սուրիա: «Արաքս»:
36. **Ստեփանոս Օրբէլեան (1859).** *Պատմություն նահանգին Միասկան* (հատ. Ա): Կ. վրդ. Շահնագարեանց (աշխ.): Փարիզ: Ի գործատան Կ. Վ. Շահնագարեանց:
37. **Ստեփանոս Օրբէլեան (1910).** *Պատմություն նահանգին Միասկան:* Թիֆլիս: Ելեքտրաշարժ տպարան Ն. Աղանեանցի:
38. **Ստեփանոս Օրբելյան (1986).** *Սյունիքի պատմություն:* Ա. Աբրահամյան (աշխ.): Երևան: «Սովետական գրող»:
39. **Ստեփանոս Օրբելյան (2023).** *Հակաձառություն ընդդեմ երկաթնակաց:* Գ. Թերգյան (աշխ.): Երևան: «Կիլիկյանպրինտ»:
40. **Վարդան վարդապետ (1960).** Վարդան վարդապետի *Աշխարհացոյց:* Հ. Պէրպէրեան (աշխ.): Բարիզ: «Արաքս»:
41. **Տէր-Մովսիսեան, Մ. արք. (1938).** *Հայկական երեք մեծ վանքերի՝ Տաթևի, Հաղարծնի և Դադի եկեղեցիները և վանական շինությունները:* Երուսաղէմ: Տպարան Սրբոց Յակոբեանց:
42. **Ումառյան, Ս. (1981).** *Սյունիքը՝ դիցարան:* Երևան: «Հայաստան»:
43. **Օրմանեան, Մ. արք. (2001).** *Ազգապատում* (հ. Ա): Սբ Էջմիածին: Մայր Աթոռ Սբ Էջմիածնի հրատարակչություն:
44. **Harutyunyan, A. (2024).** *The Spiritual Citadel of Syunik: Tatev, an illustrated investigation.* Yerevan. Matenadaran.

Bibliography (Latin Script)

1. **Acharyan, H. (1944).** *Hayots' andznanunneri bararan* (hat. B): Yerevan: Petakan hamalsarani hratarakch'ut'yun (In Armenian).

2. **Alishan, Gh. (1893).** *Sisakan. teghagrut'iwn Siwneats' ashkharhi*: Venetik: Sb Ghazar (**In Armenian**).
3. **Alishan, Gh. (1901).** *Arshaloys k'ristonēut'ean hayots'*: Venetik: Sb Ghazar (**In Armenian**).
4. **Ant'apyan, P'. (1987).** *Vardan Arewelts'i. kyankn u gortsuneut'yunē* (girk' A): Yerevan: HSSH GA hratarakch'ut'yun (**In Armenian**).
5. **Aṙak'el Dawrizhets'i (1990).** *Girk' patmut'eants'*: L. Khanlaryan (ashkh.): Yerevan: HKHSH GA hratarakch'ut'yun (**In Armenian**).
6. **Ayvazyan, A. (2008).** *Nakhijevani vimagrakan zhaṙangut'yunē* (hat. D), *Yernjak gavar*: Yerevan: "Gasprint" (**In Armenian**).
7. **Ayvazyan, S., & Badishyan, A. (2024).** Tat'ewi hushakot'oghi chartarapetut'yunē ew amrakayman nakhagtsi hayets'akargē, "*Vardzk*", 19 (ējer 9-20): Yerevan: HCHU himnadram (**In Armenian**).
8. **Barkhutareants', M. yeps. (1999).** *Aguanits' yerkir ew drats'ik'*. *Arts'akh*: Ch'obanean (kazmogh): Yerevan: "Gandzasar" (**In Armenian**).
9. **Ch'amch'yants', M. (1985).** *Hayots' patmut'yun* (skzbits' minch'ew 1784 t'vakanē) (hat. A): Yerevan: YPH hratarakch'ut'yun (**In Armenian**).
10. **Divan hay vimagrut'yan (1960).** *Gorisi, Sisiani ew Ghap'ani shrjanner* (prak II): S. Barkhudaryan (kazmogh): Yerevan: HSSR GA hratarakch'ut'yun (**In Armenian**).
11. **Ghanalanyan, A. (1969).** *Avandapatum*: Yerevan: HSSH GA hratarakch'ut'yun (**In Armenian**).
12. **Harut'yunyan, A. (2021).** *Hin Yerevani yepiskoposanst yekeghets'in. Yerkueresni-Sb Poghos-Petros*: Sb Ėjmiatsin: Mayr At'oṙ Sb Ėjmiatsni hratarakch'ut'yun (**In Armenian**).
13. **Harut'yunyan, G. (2014).** *Davanabanakan ew k'aghak'akan payk'arē* – Hayots' patmut'yun: V. Barkhudaryan ew aylk' (khmb. khorhurd), h. 2, girk' II, Mijin darer (IX dari kes – XVII dari aṙajin kes), (ējer 383-388): Yerevan: "Zangak" (**In Armenian**).
14. **Khach'ikyan, L. (2017),** Artazi haykakan ishkhanut'yunē ew Tsortsori dprots'ē, "*Ashkhatutyunner*" (hat. B): Sh. Khach'ikyan (kazmogh), Muradyan (khmb.): Yerevan: "Nairi" hratarakch'ut'yun (**In Armenian**).
15. **Khaṙatyan, H. (2001).** Yeghishe aṙak'yalē ew nra aṙak'elut'yunē, "*Hayots' srberē ew srbavayerē*": S. Harut'yunyan & A. K'alant'aryan (khmb.): Yerevan: "Hayastan" (**In Armenian**).
16. **Lalayan Y. (2021).** *Yerker* (hat. 4): S. Hobosyan (kazmogh): Yerevan: HAI hratarakch'ut'yun (**In Armenian**).
17. **Mesrop Vayots'dzorets'i (2010).** *Mesropay yerits'u Vayots'dzorets'woy Patmut'iwn Srboyn Nersisi Hayots' hayrapeti*: G. Tēr-Vardanean (ashkh.), "Matenagirk' Hayots" (ZHA hator, ZH dar, girk' A): Ant'iliias-Libanan: Kilikioy Hayots' Kat'oghikosut'yun (**In Armenian**).
18. **Mikhayēl Asori (1871).** *Zhamanakagrut'iwn teaṙn Mikhayēli Asorwots' patriark'i*: Yerusaghēm: I tp. Srbots' Yakovbeants' (**In Armenian**).
19. **Mirijanyan, D. (2017).** Karenisi vank'i Andreas ew Matt'eos aṙak'yalneri sarkofag-masunk'aranē, "*Hayastanē ew arewelak'ristoneakan k'aghak'akrt'ut'yunē. B*", hayaget-byuzandaget Karen Yuzbashyani tsnndyan 90-amyakin nvirvats mijazgayin gitazhoghov, zekuts'umner ew zekuts'umneri druyt'ner (ējer 182-186): Yerevan: HH GAA "Gitut'yun" hratarakch'ut'yun (**In Armenian**).
20. **Mkrtch'yan, A. yeps. (2013).** *Syunyats' metropolitakan at'oṙē Ōrbelyanneri ishkhanut'yan zhamanakashranum*: Yerevan: Patmut'yan institut (**In Armenian**).
21. **Mkrtch'yan, V. abgh. (2010).** Tat'ew vanakan hamaliri yekeghets'ineri himnumē, "*Ėjmiatsin*", 2010, Z (6), ējer 92-103 (**In Armenian**).

22. **Movsēs Kaghankatuats'i (1983).** Patmut'iwn Aghuanits' ashkharhi: V. Aṙak'elyan (ashkh.): Yerevan: HSSH GA hratarakch'ut'yun (**In Armenian**).
23. **MTS'HDZ i Venetik (1924).** Mayr ts'uts'ak hayerēn dzeragrats' Matenadaranin Mkhit'areants' i Venetik (h. yerkrord): B. vrd. Sargisean (kazmogh): Venetik: Mkhit'arean ukhtēn (**In Armenian**).
24. **Musheghyan, Y. (1964).** *Hatkanshakan ts'uts'ak t'angaranayin zhoghovats'uneri* (prak 1). *Hayeren ardzanagrut'yamb ararkaner*: Y. Musheghyan (ashkh.): Yerevan: HSSR GA hratarakch'ut'yun (**In Armenian**).
25. **Örmanean, M. ark'. (2001).** *Azgapatum* (hat. A): Sb Ējmiatsin: Mayr At'or Sb Ējmiatsni hratarakch'ut'yun (**In Armenian**).
26. **Petrosyan, H. (2017).** Vachaṙi Surb Step'anos vank'i peghumnerē ew hamak'ristoneakan srberi u masunk'neri ardiakanats'man khndirnerē 13-rd darum, "*Hayastanē ew arewelak'ristoneakan k'aghak'akrt'ut'yunē. B*", hayaget-byuzandaget Karen Yuzbashyani tsndyan 90-amyakin nvirvats mijazgayin gitazhoghov, zekuts'umner ew zekuts'umneri druyt'ner (ējer 228-234): Yerevan: HH GAA "Gitut'yun" hratarakch'ut'yun (**In Armenian**).
27. **[Petrosyan, H.]** Dadivank. Surb Dadii ew nra gerezmani masin - <https://monumentwatch.org/hy/monument/%D5%A4%D5%A1%D5%A4%D5%AB%D5%BE%D5%A1%D5%B6%D6%84%D5%BD%D5%B8%D6%82%D6%80%D5%A2%D5%A4%D5%A1%D5%A4%D5%AB%D5%AB%D6%87%D5%B6%D6%80%D5%A1%D5%A3%D5%A5%D6%80%D5%A5%D5%A6%D5%B4%D5%A1%D5%B6%D5%AB-%D5%B4/> - 22.12.2024).
28. **Sallant'eants', M. ts'. vrd. (1831).** *Krōnagitut'iwn k'ristonēakan ēst ughghap'ar dawanut'ean aṙak'elakan yekeghets'woy lusaworch'akrōn hayots'*: I Moskov: I tp. Haykakan chemarani tearts' Lazareants' (**In Armenian**).
29. **Shankhat'uneants', Yovh. yeps. (2014).** *Storagrut'iwn Kat'ughikē Ējmiatsni ew hing gawaṙats'n Araratay*: A. Ter-Step'anyan (ashkh.), Sb Ējmiatsin: Matr At'or Sb Ējmiatsni hratarakch'ut'yun (**In Armenian**).
30. **Simeon Yerewants'I (2022).** *Jambr*: H. Ōhanyan (ashkh.): Yerevan: Matenadaran (**In Armenian**).
31. **Smbatean, A. yeps. (1930).** Hamaṙōt patmut'iwn Tat'ewi vank'i, "*Tat'ew*" taregirk' grakanut'ean ew aruesti, Z (6) tari (ēj 276-350): Halēp-Suria: "Arak's" (**In Armenian**).
32. **Step'anos Ōrbēlean (1859).** *Patmut'iwn nahangin Sisakan* (hat. A): Karapet vrd. Shahnazareants' (ashkh.): P'ariz: I gortsatan K. V. Shahnazareants' (**In Armenian**).
33. **Step'anos Ōrbēlean (1910).** *Patmut'iwn nahangin Sisakan*: T'iflis: Yelek'trasharzh tp. N. Aghaneants'i (**In Armenian**).
34. **Step'anos Ōrbelyan (1986).** *Syunik'i patmut'yun*: A. Abrahamyan (ashkh.): Yerevan: "Sovetakan grogh" (**In Armenian**).
35. **Step'anos Ōrbelyan (2023).** *Hakachaṙut'yun ēnddem yerkabnakats'*: G. T'erzyan (ashkh.): Yerevan: "Kilikyanprint" (**In Armenian**).
36. **Tēr-Movsisean, M. ark'. (1938).** *Haykakan yerek' mets vank'eri` Tat'ewi, Haghartsni ew Dadi yekeghets'inerē ew vanakan shinut'yunnerē*: Yerusaghēm: Tparan Srbots' Yakobeants' (**In Armenian**).
37. **Umaṙyan, S. (1981).** *Syunik'ē`dits'aran*: Yerevan: "Hayastan" (**In Armenian**).
38. **Vardan vardapet (1960).** Vardan vardapeti *Ashkharhats'oyts'*: H. Pērpērean (ashkh.): Bariz: "Arak's" (**In Armenian**).
39. **Yakobean, Al. (2011).** "Gahnamak azatats' ew tanutērants' Hayots'" ew "Zoranamak", "*Bazmavēp*": 3-4 (ējer 485-550): Venetik: Sb Ghazar (**In Armenian**).

40. **Yaysmawurk' (1730).** *Girk', or koch'i Aysmawurk', or parunakē yink'ean zchaps varuts' srbots' ew znahatakut' iwn yeraneli martirosats'n ew vkayits' K'ristosi Astutsoy meroy:* K. Pōlis: I tp. Gr. dpri Marsēwanetswoy **(In Armenian)**.
41. **Yeganean Ō. (2014).** Tat'ewi gratan dzeṛagerē, "*Ashkhatut' iwnner*": G. Tēr-Vardanean (hrat. patrastets): (ējer 50-61): Yerevan: "Nairi" **(In Armenian)**.
42. **Zhamagirk' (1885).** *Zhamagirk' Hayastaneayts' s. ekeghets'woy' arareal srbots' t'argmanch'ats'n merots' Sahakay ew Mesropay ew yeraneli hayrapetats'n merots' Giwtoy ew Yovhannu Mandakunwoy ew Srboy Nersisi Shnorhalwoy:* Vagharshapat: I tp. Srboy Kat'ughikē Ējmiatsni **(In Armenian)**.
43. **ZHĒ d. hish./A (1974).** Hayeren dzeṛageri ZHĒ dari hishatakaranner (hat. A, 1601-1620): A. Hovhannisyan & V. Hakobyan (kazmoghner): Yerevan: HSSH GA hratarakch'ut'yun **(In Armenian)**.